

四庫全書

經部

欽定四庫全書

經部
易酌卷五

詳校官鴻臚寺少卿_臣梁景陽

通政使司副使_臣莫瞻菴覆勘

總校官檢討_臣何思鈞

校對官中書_臣葉蘭

謄錄監生_臣鄧培善

欽定四庫全書

易酌卷五

周易上經



坤下
艮上

利不利有攸往

五陰進而一陽孤存于上為君子者幾无以自容矣

故不利有攸往非絕世也傳謂巽言晦迹隨時消息

祁州刁包撰

以免小人之害至矣

彖曰剝剝也柔變剛也

剝訓落即七月剝來之剝柔變剛傳曰柔長而剛變也夏至一陰生而漸長一陰長則一陽消至于建成則極而成剝是陰柔變剛陽也此以五陰變五陽言本義曰柔進于陽變剛為柔亦與傳同而蒙引以剛上九方盛長而剝消于陰誤矣

不利有攸往小人長也順而止之觀象也君子尚消息

盈虛天行也

陰為小人必將聚勢合黨以為善良憂動輒得咎所以不利有攸往也坤順艮止卦之德也非象則无由見德故傳曰卦有順止之象乃處剝之道君子觀而體之言以卦之德為身之德也或以五消觀成剝故曰觀象謬矣天運流行理不可易君子進退出處與造化合符而不以己意參之故傳曰理有消衰有息長有盈滿有虛損順之則吉逆之則凶君子隨時敦

尚所以事天也說的最明盡剝之時順其消而止以待息順其虛而止以待盈故不輕往也

象曰山附于地剝上以厚下安宅

山附着于地傾塌之象故為剝為人上者觀其象而知上剝自下下食厚德上乃獲免于剝也故以厚下法坤之博厚也安宅法艮之安止也傳曰下者上之本未有基本固而能剝者末引書民惟邦本本固邦寧結之最透唐太宗曰為君之道必須先存百姓而

借喻于剖腹藏珠正合剥象之意豈惟君哉凡官長之臨民將帥之治軍皆是也

初六剥床以足蔑貞凶

卦一陽五陰上實下虛有床象在剥之初有剥床以足象蓋身以床為安剥床者剥身之漸也剥床以足則正人无以安其身故曰蔑貞凶或曰剥足未至蔑貞非也辟如搃擊人者及其身未必動及其足則自然偃仆而可以惟所欲為矣此小人害正險着何云

未至幾貞乎凶字以六三例看是指君子說看來還作戒小人之辭為是

象曰剥床以足以滅下也

剥床以足則本先撥矣故曰以幾下也大象厚下而後安居爻初剥下而居不安可知也

六二剥床以辨幾貞凶

辨在床之下足之上傳云分隔上下床之幹也剥至此則床益豎立不起而中正失位矣則有幾貞之凶

貞益幾凶益甚也

象曰剥床以辨未有與也

傳云陽未有與本義云陰未有與當以傳為是君子豈无徒只因小人道長雖君子一流人下焉者易操改節背君子而甘心小人之黨上焉者全身遠害謝君子以不犯小人之怒徒類孤矣若使合志同方之士齊心禦之猶或可免于害也此聖人戒小人又或以望君子也

六三剥之无咎

三居剛應剛以一陰處四陰之中而不為所染蓋視羣陰非我族類而左袒善良故雖當剥之時而能无咎也傳曰三之為可謂善矣不言吉何也方衆陰剥陽衆小人害君子三雖從正其勢孤弱所應在无位之地于斯時也難言免矣安得吉也其義為无咎耳言其无咎所以勸也此義甚好但于貞則吉不貞則凶其理有礙

象曰剝之无咎失上下也

與上下四陰相失則與上九一陽相得傳曰東漢之
呂強是也余謂唐張說聽宋璟之言而不附二張宋
石工鐫司馬光黨人碑而不書安民二字亦其人矣
六四剝床以膚凶

初之剝以足二之剝以辨四則直及其膚陰愈盛而
剝愈盛凶可知已傳曰貞道至此已消故更不言蔑
貞直言凶也本義云陰禍切身可見君子當是時操

心不可以不危慮患不可以不深矣

象曰剝床以膚切近災也

剝及其膚大異乎床之足與辨矣故曰切近災也

六五貫魚以宮人寵无不利

傳曰剝及君位剝之極也其凶可知故不更言剝而別設義以開小人遷善之門其義固確竊意六三應陽者也故不與羣陰為黨六五比陽者也故率衆陰以承陽象中自具此義聖人特因而著之耳五君位

以其為衆陰之主故不言君而言王后五統衆陰如
后統衆妾之象五陰共承一陽如后以衆妾進御而
荷寵愛之象禮天子三夫人九嬪二十七世婦八十
一御妻王后別其等級順序以進御于君如貫魚然
魚陰物宮人陰人以之者后也寵之者君也五陰俱
獲其利故曰无不利也

象曰以宮人寵終无尤也

陰剥陽則有尤者其始也五能改過自新率其剥陽

者而助陽則為之錄其功以宥其過故曰終无尤也然則人果善終雖有尤皆可勿論此聖人勸勉小人正以保全君子也

上九碩果不食君子得與小人剥廬

傳曰諸陽消剥已盡猶有上九一爻尚存如碩大之果不見食將有復生之理上九亦變則純陰矣然陽无可盡之理變于上則生于下无間可容息也聖人發明此理以見陽與君子之道不可亡也或曰剥盡

則為純坤豈復有陽乎曰以卦配月則坤當十月以
氣消息言則陽剝為坤陽來為復陽未嘗盡也剝盡
于上則復生于下矣故十月謂之陽月恐疑其无陽
也陰亦然聖人不言耳陰陽之義備矣余謂果有核
核有仁仁者天地生物之心也不曰未食而曰不食
天蓋特留此種以為生生之元也又曰陰道盛極之
時其亂可知亂極自當思治故中心願載于君子君
子得輿也詩匪風下泉所以居變風之終也此指檜


曹二風言按檜之終篇曰匪風發兮匪車偈兮顧瞻
周道中心怛兮曹之終篇曰冽彼下泉浸彼苞稂愾
我寤嘆念彼周京皆亂極思治之詩也或曰君子謂
一陽坤為輿五陰共承上九一陽如人之在車上也
小人謂上九變為菜也一陽上覆五陰有廬之象奇
變為偶則如廬之破壞穿漏其上而无以蓋覆其下
故曰小人剥廬也朱子曰且看自古小人欲害君子
到害得盡後國破家亡其小人曾有存活得者否嘗

試舉其最者如秦之李斯趙高漢之梁冀唐之李林甫楊國忠宋之蔡京童貫賈似道韓侂冑皆其鑒也胡雲峰曰牀上之藉下以安者也廬下之藉上以安者也始而剥牀欲上失所安今而剥廬自失所安亦豈小人之利哉

象曰君子得輿民所載也小人剥廬終不可用也

輿所以載者也君子得之不自利而公諸人民皆賴之以載故曰民所載也言君子乘時而駕綏安一世

也此與舊說少異似猶有理小人當剝之始以滅消
君子為事及其終也遂至剝廬欲求一容身之地不
可得而又何可用哉蘇君禹發明陰陽之理而推之
于吾心曰理為陽欲為陰未有不培吾心之君子而
能培世道之君子未有不去吾心之小人而能去世
道之小人此理不可不知



震下
坤上

復亨出入无疾朋來无咎反復其道七日來復利有攸

往

泰則繼之以否危之也危其否所以保泰也剝則繼之以復喜之也喜其復所以救剝也前陽為陰浸而失位今一陽動于五陰之下還反本位故曰復萬物生生之氣由茲始故為亨傳亨訓盛此時一陽甚微恐未至盛處只訓通為是傳曰出入无疾出入謂生長復生于內入也長進于外出也先云出語順耳陽生非自外也來于內故謂之入物之始生其氣至微

故多摧折春陽之發為陰寒所折觀草木于朝暮則
可見矣出入无疾謂微陽生長无害之者也或曰出
者剛長也入者剛反也又曰无疾即臨卦剛浸而長
之浸言陽生有漸而不遽也頗有理朱子云陽无驟
生又云一氣不頓進二形不頓虧即是此意以一身
言善念始萌須循序積累而後可不然恐有進銳之
患以朝廷言正人始進須漸次整頓而後可不然恐
有激變之憂大象安靜以養微陽亦此意也孤陽无

朋豈能便勝羣陰須待諸陽以漸而來乃能勝羣陰而發育萬物故曰朋來无咎以一身言要刻勵做人須得良朋好友乃有長進李延平晚得朱元晦曰昔于羅先生得入處後无朋友幾放倒了得渠如此極有益此審于朋来无咎之義也以朝廷言要刻勵做事須衆正戮力同心乃有功效如東漢竇李諸公羣賢在外不能收攬入内只有張奐一人又棄之為羣小用此不審于朋来无咎之義也陰陽迭為消長往

來循環不已故曰反復其道七日來復其解頗多傳
義俱取自姤至復之說姤陽之始消也自五月姤一
陰生至于十一月一陽生歷七爻七變而成復故曰
七日猶詩所云一之日二之日也在天時則陽氣發
越生生不窮在人則陽道昌明進進不已故利有攸
往也

愚按七日之說折衷獨主陸氏甚為有理詳見臨卦

彖曰復亨剛反

剛窮上而反下故亨反即復意但自其回頭言之曰
反自其還元言之曰復

動而以順行是以出入无疾朋來无咎

震動于下而坤以順行于上是以出入无疾朋來无
咎出入朋來陽之動也无疾无咎以順行也傳曰卦
才本義曰卦德其義一也

反復其道七日來復天行也

二氣如環而往數不可易也一陽應候而來數不能

違也蓋消長相因天運自然之理也

利有攸往剛長也

剝曰小人長陰長也故不利有攸往復曰剛長君子長也故利有攸往剝順以止而復順以行亦其義也復其見天地之心乎

復非天地之心復乃見天地之心見字要看傳曰一陽復于下乃天地生物之心也先儒皆以靜為見天地之心蓋不知動之端乃天地之心也非知道者孰

能識之至哉言乎自古未有說至此者從此理會兼
取邵朱二詩讀之復之義无餘蘊矣邵子曰冬至子
之半天心无改移一陽初動處萬物未生時玄酒味
方淡大音聲正希此言如不信更請問庖羲朱子曰
忽然夜半一聲雷萬戶千門次第開識得无中含有
處許君親見伏羲來讀二詩豈特見庖羲哉併文王
周公孔子皆見之矣

象曰雷在地中復先王以至日閉關商旅不行后不省

方

雷在地中一陽始復之時也陽始生于下而甚微安靜而後能長先王順天道故以冬至之日閉關使商旅不行后不省視四方既曰先王又曰后后謂後王也蓋先王之制如此舜十一月朔巡狩而此言不省方蓋巡狩者是月也不省方者是月之至日也月令云齋戒掩身以待陰陽之所定正是此意如萌芽方生須用培養如胚胎方成須用保護大抵收斂閉藏

凡事不肯輕洩些子象特舉其大者而言耳按至日震一陽象闔戶又一陽橫亘于下閉闔象震為大塗坤衆商旅象關閉矣不行象震為君后象坤為土方象君不居五而居初潛居深宮不省方象

愚按今考來註每卦皆如此取象深為有理宜詳之

初九不遠復无祇悔元吉

傳曰復者陽反來復也陽君子之道故復為反善之義初陽剛來復處卦之初復之最先者也是不遠而

復也失而後有復不失則何復之有唯失之不遠而復則不至于悔大善而吉也聖人不貴無過而貴改過故以元吉為大善而吉无祇悔不至于悔也本義因之又曰顏子无形顯之過夫子謂其庶幾乃无祇悔也過既未形而改何悔之有既未能不勉而中所欲不踰矩是有過也然其明而剛故一有不善未嘗不知既知未嘗不遽改故不至于悔乃不遠復也解繫辭最為詳明

象曰不遠之復以修身也

修身必先正心復者天地之心也以天地之心為心而身安有不修者乎修如修我牆屋之修去其疵累還吾粹精之本體也傳曰學問之道无他也唯其知不善則速改以從善而已二語極精

六二休復吉

學以親仁為要得仁者而親之則日躋于美善故曰休復吉胡雲峯曰遜貴遠遠莫遠于上九而九五能

比之故曰嘉遯遯之美者也德貴不遠初九曰不遠
復而六二能比之故曰休復復之美者也里仁為美
亦此意與引喻甚確

象曰休復之吉以下仁也

克己復禮為仁不遠復復于仁也傳曰仁者天下之
公善之本也初復于仁二能親而下之蓋以初之修
身者修其身故美而吉也

六三頻復厲无咎

三陰躁不中正而處動之極故為頻復傳曰復之頻復而不能固者也既曰頻復則必頻失故言厲以儆之雖曰頻失猶幸頻復故言无咎以勸之在常人或以屢失而掩其復在聖人則以屢復而恕其失皆所以開遷善之門也高順嘗謂呂布曰舉動不肯諦思動輒言誣誣事豈可數慎毋恃改過為盛德而漫无絕私勝己之力此又六三之藥石不可不知也

象曰頻復之厲義无咎也

點出義字義者宜也屢失則不宜屢復則宜知義則
漸進于仁矣故雖厲而无咎也

六四中行獨復

以四為中取上下各二陰為義所謂時中也傳善矣
本義似尤精本義云四處羣陰之中而獨與初應為
與衆俱行而獨能從善之象當此之時陽氣甚微未
足以有為故不言志然理所當然吉凶非所論也董
子曰仁人者正其誼不謀其利明其道不計其功于

剝之六三及此爻見之比傳何等醒豁何等精透按
後世如徐庶身陷曹操而終身不畫一謀心乎漢也
庶幾中行獨復者矣

象曰中行獨復以從道也

所從者陽剛君子也故曰從道

六五敦復无悔

五居坤之中體載有厚德者也故為敦厚復善之象
傳曰雖本善戒亦在其中矣陽復方微之時以柔居

尊下復无助未能致亨吉也能无悔而已蓋五居君位與六二繫應僅自厚于復故文辭如此蒙引好善慕德等語俱未是胡氏以為善行之固以為成德之事亦是但不當借初來相形謂五勝初也蒙引既發明此義而又曰无悔尤勝无祇悔相矛盾矣象曰敦復无悔中以自考也

傳義考俱訓成余意中謂五考即視履考祥之考言內自省考動不失中故无悔也若合六二之中而共

考之則亨吉矣

上六迷復凶有災眚用行師終有大敗以其國君凶至
于十年不克征

爻辭未有如是之詳且凶者以本心喪失故无施而
可也傳曰以陰柔居復之終終迷不復者也本義因
之徐進齋曰地絕既无下仁之美剛遠則失遷善之
機陰重已有難開之蔽柔終安望改過之勇迷復之
義備矣傳災天災自外來眚已過由自作兼兩意說

極是朱子獨作過誤恐未的書肯災肆赦亦是兩意
傳曰迷道不復用以行師則終有大敗以之為國則
君之凶也十年者數之終至于十年不克征謂終不
能行既迷于道何時而可行也此以行師治國對言
固是余意師必明紀律明賞罰而後可行迷復者冥
昧而不自振必有覆軍之禍故曰大敗兵敗則及其
國國敗則及其君至于十年不克征不克征謂不能
行師也正見終有大敗終而不返安有雪恥之日乎

如此一律說亦通

象曰迷復之凶反君道也

爻有國君之辭故象曰反君道或謂不連上說非是
傳曰復則合道既迷于復與道相反也其凶可知以
其國君凶謂其反君道也人君居上而治衆當從天
下之善乃迷于復反君之道也非止人君凡人迷于
復者皆反道而凶也既從反道說到君上去又從君
道廣推之何等周密



震下
乾上

无妄元亨利貞其匪正有眚不利有攸往

卦上乾下震故傳曰動以天為无妄動以人欲則妄
矣二句便盡卦義又曰无妄者至誠也至誠天之道
也天之化育萬物生生不窮各正其性命乃无妄也
從天說來无妄的源頭纔明了又曰人能合无妄之
道則所謂與天地合其德也无妄有大亨之理君子
行无妄之道則可以致大亨矣无妄天之道也卦言

人由无妄之道也如此說到人身上來卦義乃有着落又曰法无妄之道利在貞正失貞正則妄也雖无邪心苟不合正理則妄也乃邪心也故有匪正則為過昔如此說纔是无妄的匪正又曰既已无妄不宜有往往則妄也此則因象傳无妄之往一句發也朱子發明无邪心而不合正理一句以為賢知之過又曰佛氏亦豈有邪心哉又兼動靜言何其詳以盡也非朱子不能發明程子之義至此由此推之則申生

之死于父子路之死于衛皆无邪心而不合正理者也理學素用莊敬持養功夫若應事接物有一不恰好處便犯此卦的戒了

彖曰无妄剛自外來而為主于內動而健剛中而應大亨以正天之命也其匪正有眚不利有攸往无妄之往何之矣天命不佑行矣哉

傳曰謂初九也坤初爻變而為震剛自外而來也本義曰自訟而變九自二來而居于初也或曰乾為外

卦震之剛自乾來亦通初九為成卦之主而居內之
第一爻故曰為主于內卦之主正无妄之主也以卦
德言之震動乾健是其動剛健內外皆无妄也以卦
體言之五剛健中正二象順中正二五相應上下皆
无妄也所謂元亨者言大亨之道祇是以正此非人
私智所能為也天之命也天命即天道所謂天道无
妄而已本義曰其有不正則不利有所往欲何往哉
只一直說傳則曰所謂匪正蓋由有往若无妄而不

往何由有匪正乎无妄者理之正也更有往將何之
矣如此纔說的无妄之往意出胡氏附會本義以此
句與泰卦包荒得尚于中行例看誣矣天命只是无
妄无妄而又往則逆天之命矣天尚不佑其何以行
之哉聖人之言特加婉曲曰行矣哉仍是何之矣語
氣无妄匪正特肯耳何以便云天命不佑張南軒云
一念纔不是便致上帝震怒正此意也在常人一念
之正則誘而進之如頻復而許以无咎之義是也在

至人一念之不正則危而懼之如匪正而戒以不佑
之天是也易之教人至矣

謹按剛自外來而為主于內說者不一卦變謂訟卦
九二來居于初若然則是自內來非自外來矣其說
固不可從其餘若王氏胡氏何氏之說雖不甚相遠
而殊无義意與來氏端言卦繇者正同折衷獨取趙
氏之說以謂在卦為震得乾最初之畫在人為吾心
得天最初之理此所以為无妄也天理非由外鑠我
者此特卦象言之見自乾來之意極是竊意諸卦但
言往來上下已耳此獨言自外來者何居蓋象言不
利有攸往以其自外來也程子所謂動以人者是也
初言往吉以其為主于內也程子所謂動以天者是
也夫一剛也外來則不利為主則往吉易之
不可為典要如此其教人之意亦深切矣

象曰天下雷行物與无妄先王以茂對時育萬物

雷行于天下則萬物竦然震動无復私邪之萌是物
物與之以无妄也程朱俱說到各正性命處其意深
矣先王觀天下雷行發生賦與之象而以茂對時使
四時之行无妄也育萬物使萬物之生无妄也時曰
茂對言盛其精神有與天時相匹敵者矣萬物曰育
則海隅蒼生罔不率俾暨鳥獸魚鱉咸若也蓋雷未
行先王事天以靜則有閉闕却行之事雷既行先王

事天以動則有對時育物之功故程子曰先王无事
不順天時也

初九无妄往吉

九乾體初震始居內而為无妄之主者也无妄誠也
至誠能動故曰往吉蓋正而匪貴利有攸往與卦辭
異矣卦言往不利以其既无妄而又有往出于无妄
之外也文言往吉即以其无妄往生于无妄之內也
程傳立義精矣

象曰无妄之往得志也

无妄者已也往而吉則人物皆无妄矣故曰得志也
傳曰以之修身則身正以之治事則事治以之臨人
則人感而化无所往而不得其志也盡之矣

六二不耕獲不菑畲則利有攸往

坊計引易曰不耕獲不菑畲凶不知何所本而與此
相反也傳分三層說甚晦難解朱子謂耕獲菑畲四
事都不做本義云因時順理而无私意期望之心故

有不耕獲不菑畲之象較傳固為現成但全不事事而利有攸往豈不起人徼倖之心非聖人立教之意也又云如聖人之無為而治如學者之不要人爵而人爵從之若然則是聖人之無為而治果真一无所為同于老氏之無為矣學者不要人爵而人爵從之豈遂不修天爵耶于理未確訂詁曰不方耕而即望其有獲也不方菑而即望其成畲也此解甚好但方字即字未是不方耕而即望其獲豈既耕而可望其

獲耶不方菑而即望其畬豈既菑而可望其畬耶余
謂二柔順中正盡其在我與五為應而不責報不耕
獲者不以耕而望其獲也不菑畬者不以菑而望其
畬也此即先事後得之意所謂正其誼不謀其利明
其道不計其功也復之六四本義引董子之言為作
易之聖人言也此又引董子之言則為六二言也夫
有春之耕則有秋之獲有一歲之菑則有三歲之畬
此情理之必然者也二雖不以耕而望獲然耕矣豈

有不獲者二雖不以畱而望畬然畱矣豈有不畬者
故利有攸往特加則字言不如此即如此所謂无妄
之福也

象曰不耕獲未富也

傳曰未者非必之辭言非必以獲畬之富而為也只
此二句足矣本義曰富如非富天下之富言非計其
利而為之也亦好余向謂爻辭即君子謀道不謀食
之意象辭即孔明所謂臣死之日不使家有餘財原

有餘粟之意亦是一說姑存之

六三无妄之災或繫之牛行人之得邑人之災

傳以為有得必有失訂詁以三不宜應上為行人則得牛為邑人則失牛非也唯本義行人牽牛以去而居者反遭詰捕之擾二語極好但其說未暢耳余意无其事而有其害曰无妄之災此一句為主下三句總解此句或繫之牛謂上九也上與三為正應故繫其牛于三之邑也然相去甚遠行人因利乘便而牽

之以去與三固无與也上以牛在其邑又疑其陰邪
不中正故捕而詰之此所謂无妄之災也在三則諺
所謂人偷牛他拔概在上則律所謂誣指平人為盜
也故上九曰行有青然六三災雖无妄實素行不正
有以取之此亦聖人惡居下流之意與

謹按易之取象皆以八卦之象為主即如此卦六三
乃坤之三爻也坤為子母牛故以牛取象然變為震
之三爻處動之極故又為繫而復失之象且三與二
皆陰二柔順中正故有无妄之福三以柔居剛不中
不正故有无妄之災驗之人事莫不皆然聖人作易
所為取萬世之人情物理无不總括而兼貫之也又

此文即大畜之六四然大畜六四乃坤之初爻也故亦曰牛而為童牛變艮為止故又為加牯之象易之取象明顯如此必欲刻而求之謂某為純某為鼻某為手某為邑某為盜且于本卦互卦之外搜及旁卦擬議以求合未免雕鑿

象曰行人得牛邑人災也

爻外不加一語但取其辭以重述之言外便見得災生无妄意聖人註經之妙如此

九四可貞无咎

凡卦莫不以相應為善无妄獨不取應義以有所繫

應則妄也故二應五則疾三應上則災惟四與初无
應故初吉而四无咎也四以陽剛居乾體復无應與
无妄者也可猶當也言當堅確守之不少移易則无
咎也或曰可貞者恐其未必貞也故決之
象曰可貞无咎固有之也

傳義有俱訓守言固守其剛健之本體也

九五无妄之疾勿藥有喜

五陽剛中正而居尊位二復以中正應之无妄之至

也如是而有疾不煩藥石攻治行當自愈而有喜矣
疾則憂疾愈故喜也傳曰无妄之所謂疾者謂若治
之而不治率之而不從化之而不革以妄而為无妄
之疾舜之有苗周公之管蔡孔子之叔孫武叔是也
然則至誠无妄其正療病之善藥乎
象曰无妄之藥不可試也

傳曰既无妄矣復藥以治之是反為妄而生疾矣故
曰不可試試謂少嘗之也本義全用之

上九无妄行有眚无攸利

天地間原有恰好道理在過當反不是上居无妄之極不可以有行也行則過于正而有眚何利之有卦所謂匪正有眚不利有攸往正謂此也張中溪曰漢武漢北之征唐皇雲南之師此文之謂矣蒙引曰尾生孝已之行也俱有理

象曰无妄之行窮之災也

本義云上九非有妄也但以其窮極而不可行耳行

則傳所謂窮極而為災害也二義合參之始得



乾下
艮上

大畜利貞不家食吉利涉大川

均一乾也畜之以巽陰畜陽也畜之以艮陽畜陽也
故有小畜大畜之分以畜聚言則其蘊大以畜止言
則其力大以畜養言則其德大傳曰在人為學術道
德充積于內乃所畜之大也大畜而不以正或馳于
詞章或染于功利或溺于虛無傳所謂異端偏學是

也畜雖大亦奚以為故曰利貞利貞者正已以正天下也共天位享天祿則不食于家然後可以行其所學也故曰不家食吉畜極而流其大也行與天下共之可以拯溺可以濟險故曰利涉大川傳曰此只據大畜之義而言象更以卦之才德而言諸爻則惟有止畜之義蓋易體道隨宜取明且近者此義須知象曰大畜剛健篤實輝光日新其德

剛健謂乾體篤實輝光謂艮體日新其德兼兩體言

進進不已也若蹈常襲故則其畜日竭而不大矣

剛上而尚賢能止健大正也

本義以剛上為卦變謂此卦自需而來九自五而上傳則謂剛上陽居上也陽剛居尊位之上而二柔奉之為尚賢之象此理自好不曰健而止而曰能止健艮上乾下也乾天下之至健而艮能止之非大正不能大正指上九一陽言按爻義本取二柔畜剛象傳獨歸功一陽而二柔之小不與焉其義深矣

不家食吉養賢也

不家食吉謂朝廷隆大烹之奉以養賢而賢者出而有為也

利涉大川應乎天也

利涉大川應乎天者傳謂六五君位下應乾之中爻乃大畜之君應乾而行也所以發明卦才也或曰此取上下兩卦體相應不啻指一爻言亦通

象曰天在山中大畜君子以多識前言往行以畜其德

天包地外如何在山中故本義曰不必寔有是事但
以其象言之也唯天為大而為山所畜至大之象也
君子觀大畜之象而從事于學問所謂道問學以尊
德性也傳曰人之蘊畜由學而大在多聞前古聖賢
之言與行察言以求其心考跡以觀其用識而得之
以畜成其德乃大畜之義也數語可作畜德箴愚謂
前言往行德之資也多識前言往行畜之功也此正
多聞多見一証也陽明之徒每謂聞見為心累欲掃

而去之是天不在山中而德不在言行中也无實修
而言虛悟豈大畜之君子哉是故多識前言往行而
不以畜德玩物喪志俗學也鄭康成張茂先一流是
也畜其德而不多識前言往行耽空守寂禪學也楊
慈湖王龍溪一流是也

初九有厲利已

初陽剛又乾體而居下利于進者也然上應四而為
其所畜四在上得位有不可犯之勢初若不量而進

其能免于厲乎故不利進而利己也傳曰大畜艮止
畜乾故乾三爻皆取被止為義艮三爻皆取止之為
義在他卦則四與初為正應相援者也在大畜則相
應乃為相止畜此義正須識得

謹按程子云凡卦皆從乾坤二卦變來即如此卦初
九乃乾之初九也在潛而勿用之地又為六四所畜
故利于已則不犯災九二為六五所畜故雖在田而
德施不能普為與說輟之象三則健極而進又應上
之畜極而通故為良馬馳逐之象止艮為徑路為門
闕上又為天衢故利有攸往此皆卦中現具之象不
待搜索于錯卦綜卦而得者試以无妄上三爻類推
之亦然因黎明時思索此文並及无妄上九象傳何

以金用乾卦上九文言之句益
信程子之言蓋確有所見云

象曰有厲利已不犯災也

厲災也已則不犯矣故利

九二輿說輶

二之受畜于五與初之受畜于四同則有厲亦同但
二居中得正故不須以厲戒之而自己為輿說輶之
象輿說輶安止不前也按輶與輻不同輻車輪之輹
凡三十六條者也輶車上伏兔蓋所以承輻者也故

小畜之說輻蓋為陰所止所說者重久住之計也大畜之說輻蓋自止而不進所說者微暫止而可旋起者也如此分別纔是

象曰輿說輻中无尤也

輿說輻者見幾而无觀望兩可之心蓋其處得中道動不失宜故无過尤也傳說極是或作中心之中非矣

九三良馬逐利艱貞曰閑輿衛利有攸往

三健極而進上畜極而通俱有不可禦之勢且兩剛
同體不相畜而相應進不留行故為良馬馳逐之象
言其速行也傳曰雖其進之勢速不可恃其才之健
與上之應而忘備與慎也故宜艱難其事而由貞正
之道如此說始妥註言不憂險阨則貞字說不去或
以艱貞對說亦未是有馬則有輿有輿則有衛都是
相因物事閑習車輿範我馳驅也閑習防衛用戒不
虞也曰字宜如程朱作日月之日或云如字讀作嘆

辭鑿矣日閑輿衛其堅貞之寔乎利有攸往其日閑輿衛之效乎

象曰利有攸往上合志也

四畜初則志不合五畜二則志不合上不畜三而應三故曰合志合志者同心一德之謂也

六四童牛之牯元吉

凡遇惡者禁之于已然則難為力防之于未然則易為功四畜初防于未然故有大善之吉也初以一陽

居最下之位故曰童牛傳以童牛為始角本義以童牛為未角若未角恐无所施其牯矣况本義明云牯者福衡施橫木于牛角以防觸者乎固知傳說為是傳解文既明又曰槩論畜道則四良體居上位而得止是以正德居大臣之位當畜之任者也大臣之任上畜止人君之邪心下畜止天下之惡人人之惡止于初則易既盛而後禁則扞格而難勝故上之惡既甚則雖聖人救之不能免違拂下之惡既甚則雖聖

人治之不能免刑戮莫若止之于初如童牛而加牯
則元吉也推廣之義大矣

謹按此文之義傳義言理精矣若言象猶未允協也
何也以牯為楅衡謂施橫木于牛角以防其觸夫童
牛未角橫木施于何處即有可施亦不過防其觸耳
非能禁之使不得觸禁其角使不得長也于畜止之
義未甚切當且細味此卦象辭大象文辭似不尚言
畜止也畜養意亦不可少其在周書費誓篇曰今惟
淫舍牯牛馬註曰牯閑牧也夫牛之性順閑之易易
也童牛而加閑更易為力矣此則于畜止畜養義皆
可相通且于禁于未
然之理亦不相悖

象曰六四元吉有喜也

上不勞禁制下不傷刑誅而惡人馴習坐獲大善之吉上治于此再見矣故可喜也

六五豮豕之牙吉

二陽已壯而畜之較初之用力難矣故以豕牙取象牙者剛躁之物也然鋤強戢暴都有要領在傳所謂物有總攝事有機會是也六五柔中居尊能直尋受病根因一刀斬斷則剛躁自止故以豮豕取象蓋豕去其勢則牙无所肆其毒矣但視四之畜初已落第

二着故言吉而不言元也傳曰君子法獮豕之義知天下之惡不可以力制也則察其機持其要塞絕其本原故不假刑罰嚴峻而惡自止也且如止盜民有欲心見利則動苟不知教而迫于飢寒雖刑殺日施其能勝億兆利欲之心乎聖人則知所以止之之道不尚刑威而修政教使之有農桑之業知廉恥之道雖賞之不竊矣此治天下之大道也不可不知

謹按此文以豕牙取象程傳遂謂豕剛躁之物而牙為猛利獮去其勢也去其勢則牙雖存而剛躁自止

以喻治民者不尚嚴刑而修政教其理自好而于物理未之察也來註解牙字極是乃以齧為騰謂是走豕又引互卦變卦錯卦以明之未免扭捏牽強沾滯不通非聖人遠取諸物近取諸身自然而然无所安排之義矣竊意豕牙雖剛不聞嚙人養豕之家不問牝牡俱皆齧之豈為其牙而然乎則牙之非齒牙也斷可知矣俾雅云牙者畜齧豕之戕也蓋豕性猛突而又善逸豕而齧則不逸而易養且繫豕以杙江淮之間所在有之聖人取象大約本此蓋迫而易見故也且于畜止畜養二義相通于不尚嚴刑之理亦不相悖也

象曰六五之吉有慶也

人心革惡從善風俗革薄從忠人君之慶亦天下之

慶也

上九何天之衢亨

傳本胡先生之說曰何字衍本義作贊嘆語曰何其
通達之甚也固有理訂詁云何儋也負也與詩何天
之寵百祿是何義同又別王延壽賦荷天衢以元亨
句為証言上九畜極而通肩鴻任重以翱翔于天路
而不為羈勒之所制也其說更暢蓋五天位也上位
乎天之上又艮為徑路有天衢象傳曰天衢天路也

謂虛空之中雲氣飛鳥往來故謂之天衢天衢之亨
謂其亨通曠濶无有蔽阻也本義豁達无碍亦是此
意

象曰何天之衢道大行也

傳以象有何字為設問辭此本註說非也不如直作
負荷意為是蓋道即道德之道得諸心曰德達諸外
曰道德大畜故道大行也象所謂不家食吉利涉大
川者正指此文



震下
艮上

頤貞吉觀頤自求口實

卦體上下二陽内含四陰外實內虛上止下動為頤之象養之義也此本義全用程傳也傳言頤道之正兼養德養身養人養于人數義始盡蓋養身而不以正則為口腹之奉養德而不以正則為黃老之學養人而不以正則有素餐之譏養于人而不以正則有鋪啜之羞故頤曰貞吉統言一卦之義也頤自求口

實統言觀人觀己之道正則吉不正則凶也不言善惡吉凶欲學者諦審而究圖之也傳為指出發明聖人言外之意耳傳又有養生養形養德養人之說曰動息節宣以養生也是要靜飲食衣服以養形也是要儉威儀行義以養德也是要敬推己及物以養人也是要恕靜儉敬恕四字學者缺一不可

象曰頤貞吉養正則吉也觀頤觀其所養也自求口實觀其自養也

頤貞吉養得其正則吉也觀頤觀其所養之道于人
也自求口實觀其自養之道于己也觀下句言自則
上句當屬人項氏曰養人指上九言自養指初九言
初上二陽上下兩卦之主爻也非孔子贊辭明白則
後儒必不分作養己養人兩條看極是朱子不作養
人說故本義云觀其所養之道及其答門人則已有
程傳似勝之說矣又以下體三爻皆是自養上體三
爻皆是養人証程傳之確固知本義亦有未訂正者

天地養萬物聖人養賢以及萬民頤之時大矣哉

推養之義天地養萬物養以正也養以正故萬物育
焉聖人養萬民亦猶天地之養萬物也若只從百姓
做起焉得人人而養之故須用賢圖治賢之未成也
廩糈養之于學校賢之既成也爵祿養之于朝廷或
育養或培養然後人才出政教立而膏澤下于民矣
養賢正所以養萬民也是謂德配天地養之至也頤
之時大矣哉統贊天地與聖人之功也傳曰或云義

或云用或云時以其大者言也萬物之生與養時為大故云時此皆確不可易也

象曰山下有雷頤君子以慎言語節飲食

以卦義言之上止下動頤頤之象以卦形言之外寔內虛頤口之象君子觀其象而得養身之道焉慎言語以養其德節飲食以養其體傳德體二字極盡如何易的故本義但以切務贊之而又由一身之言語推之于號令政教由一身之飲食推之于貨寶財用

養德養天下之道皆具焉其旨深矣不然以謹勅為
慎以儉嗇為節未足以盡大象之義也或引諺禍從
口出病從口入二語而言曰言語一出而不可復入
故君子慎之飲食一入而不可復出故君子節之言
語飲食動象曰慎曰節止象其理自好愚謂慎言語
立誠之學也節飲食无欲之學也昔温公告劉安世
以誠曰自不安語始安世摠括七年而後成羅仲素
初見龜山告以飢者甘食渴者甘飲人能无以飢渴

之害為心害則不及人不為憂矣令仲素思索且云
此語若易知易行而有无穷之理仲素思之數日疏
其義以呈龜山云更于心害上一着猛省仲素一生
服膺此語此二事可為慎言語節飲食者一大榜樣
初九舍爾靈龜觀我朵頤凶

戴記以龜為四靈之一故曰靈龜龜咽息不食非待
養于人者所謂人人有貴于己者良貴也舍此而朵
動其頤于四則為垂涎之狀矣傳曰迷欲而失己以

陽而從陰則何所不至是以凶爾謂初外之也我謂四愧之也假設之辭正教誨之道也蒙引云此文如

東漢之華歆最妙

象曰觀我朵頤亦不足貴也

初之才剛健明智者也剛不能自立而屈于欲焉得剛明不能自照而失其正焉得明不明不剛而役于口腹飲食之人則人賤之矣故曰亦不足貴也

六二顛頤拂經于丘頤征凶

居上養下不可易之經也傳曰天子養天下諸侯養一國臣食君上之祿民賴司牧之養其義備矣二在初之上而求養于初顛倒而拂其常經矣程朱俱一串說下惟胡雲峯以拂經為違正應亦是下既不能養將轉而之于上則為丘頤丘指上九也上在外而高有丘象不相應豈能相養非道妄動是以凶也傳曰今有人才不足以自養見在上者勢力足以養人非其族類妄往求之取辱得凶必矣又曰六二中正

在他卦多吉而凶何也曰時然也陰柔既不足以自養初上二爻皆非其與故往求則悖理而凶也可謂曲盡矣

謹按項氏曰頤卦惟有二陽上九在上謂之由頤固為所養之主初九在下亦足為自養之賢靈龜伏息而在下初九之象也柔頤在上而下垂上九之象也上九為卦之主故稱我羣陰從我而求養固其所也初九本无所求乃亦仰而觀我有靈而不自保有貴而不自珍宜其凶也折衷取之以為可備一說今即此文及逐爻細味之項氏之說其理甚長何也以此爻為求賢于初而以于丘為上九似多一轉不若從來氏之說以顛為項謂上九居艮之極上乃山顛之象亦自有理蓋養道宜靜不宜動初可自養而為動

之主是失其良貴而求貴于趙孟者也故不足貴而得凶六二中正而亦凶者蓋違正應而往求于是趨炎附勢奔走權貴以求養者故失類而征凶也六三與上本為正應其求養于上宜矣然六三陰柔不正居多凶之位而為動之極恃其正應必有非所求而求者故于養之道大悖而終无所利也四與上非其正應而顛頤吉何也來氏云艮為虎故取象于虎天下之物自養于內者莫如龜求養于外者莫如虎龜自養于內內卦初舍之故凶虎求養于外外卦上施之故吉蓋虎見物將捕之必先伏其身而注視之故有耽耽之象耽耽者視之專也其欲遂遂者所欲之物東轉則目隨之東西轉則目隨之西也四居大臣之位下應初九之賢得養于上而施及于下養賢及萬民者也可謂施祿及下而施之有光者也五上兩爻傳義俱極明確故茲不復贅

象曰六二征凶行失類也

行失類傳專指上九言本義則兼言之曰初上皆非其類也玩象辭六三征凶則顛頤拂經全辭皆在其中矣本義為是

六三拂頤貞凶十年勿用无攸利

頤之道唯正則吉得頤之正求養養人則合于義自養則成其德故所養皆吉三以陰柔之質而處不中正又在動之極是柔邪不正而動者也其養如此拂

違于頤之正道是以凶也本義云既拂于頤雖正亦凶六三不中正恐无庸此一轉主傳為是勿用言為時所棄十年數之終十年勿用則終不可用矣何利之有

象曰十年勿用道大悖也

道者養正之道也拂于正則大悖于道矣是以遷延至于十年之久而不見用也

六四顛頤吉虎視眈眈其欲逐逐无咎

四居大臣之位陰柔不足以濟而求養人之道于初
顛頤也二與初非應而志在自養故顛而凶四與初
正應而志在養人故顛而吉所居之位異而公私不
同也虎視眈眈其欲逐逐二句最難解朱子亦以為
理會不得只是敷衍解去程傳立威嚴之說晦矣不
如作下賢說按荀九家易艮為虎故四以虎取象虎
垂首下視更不回轉眈眈其視極狀任賢勿貳唯恐
失之之意本義所謂下而尚也逐逐其欲極狀心乎

愛矣久而不渝之意本義所謂求而繼也用賢以養人耑而且久故可以无咎也傳曰自三以下養口體者也四以上養德義者也以君而資養于臣以上位而賴養于下皆養德也吉凶之辨昭然矣又下三爻震體主動故凶上三爻艮體主止故吉以此見處頤之時宜靜不宜動明矣

象曰顛頤之吉上施光也

居上位而無德以施于人无色甚矣得初陽剛之賢

共濟其事則膏澤下于民榮施不既多乎此顛頤所以吉也

六五拂經居貞吉不可涉大川

五與二正應也拂二以求養于上拂經矣然上九以陽德居師傅之位五能順而從之正也堅守正道坐享上九之成功故不可涉大川耳不利涉大川莫說壞了傳曰能持循于平時不可處艱難變故之際朱子曰猶洪範用靜吉用作凶守常則吉涉險阻則不

可也毛氏曰无事猶可以分相縻欲有所為則難以濟矣皆非也五操養人之權不自用而歸諸上九所謂聖人養賢以及萬民者也養賢者无煩勞力為養民之事豈必冒險而往乎故曰不可涉大川也涉大川者上九之事非六五之事也故上九一爻曰利涉大川且五不言頤而上曰由頤其說益明矣象曰居貞之吉順以從上也

傳曰居貞之吉者謂能堅固順從于上九之賢以養

天下蓋舉國以聽惟所欲為而不復從中制也

上九由頤厲吉利涉大川

以六五之君柔順而從上九之臣是上九當天下之
任天下皆由之以養也故曰由頤任大責重使非慄
慄常懷危懼能勝厥任乎故曰厲吉伊尹挹納溝之
恥周公屢待旦之勤用是道也以陽剛之才兢業之
德居上位而養天下舉凡風波險阻六五所不可涉
者以一身涉之而裕如故曰利涉大川昔寇萊公澶

淵之役可謂利涉大川矣所少者厲之一字故小人乘間而入而天下不得邀大慶焉非知易者也

象曰由頤厲吉大有慶也

養天下而不有其功斯民庶幾乎含哺而鼓腹矣故曰大有慶也



巽下
兌上

大過棟橈利有攸往亨

大過者陽過也故為大者過傳云聖賢道德功業大

過于人凡事之大過于常者皆是也非有過于理也
朱子語類問大過小過先生與伊川之說不同曰然
伊川此論正如以反經合道為非相似不知大過自
有大過時節小過自有小過時節處大過之時則當
為大過之事處小過之時則當為小過之事在事雖
是過然適當其時合當如此做便是不過于理此朱
子所以有功于程子也四陽居中過盛上下二陰皆
弱故為棟橈之象蓋棟取其勝重四陽聚于中可謂

重矣九三九四取象于棟謂任重也棟橈似不利有攸往矣然陰弱陽強正小人衰君子盛之時故利有攸往而亨也

彖曰大過大者過也

不曰過之大而曰大者過大者陽也大者過陽倍于陰故過也

棟橈本末弱也

初本也上末也上下俱陰不堪四陽之任故曰弱

剛過而中巽而說行利有攸往乃亨

四陽過剛而二五却得中處不失中道卦之體也下
巽上兌巽順和說而行卦之德也中道而巽說則可
以抑過剛之弊而扶本末之弱故利有攸往亨義即
在其內蓋利有攸往乃其所以亨也

大過之時大矣哉

傳贊大過之時之大而曰如立非常之大事興不世
之大功成絕世之大德皆大過之時之事也愚謂有

絕世之大德而後能樹不世之大功有不世之大功而後能勝非常之大事三者又有相因之序焉是故有其時而无其事者陋也有其事而无其時者妄也堯舜揖讓湯武征誅君道之大過也霍子孟廢昏立明狄梁公反周為唐臣道之大過也程子所謂常事之大者非有過于理也

象曰澤滅木大過君子以獨立不懼遯世无悶

兌為澤澤在下者也巽為木木在上者也今澤在木

上則澤滅木大過之象也然木雖没于澤而植立不
撲者自在故君子觀其象而以獨立不懼遯世无悶
焉獨立不懼者卓爾自立不以利害禍福為念孟子
之不動心是也遯世无悶者確乎自信不以是非毀
譽為心孔子之不怨天不尤人是也兩者皆大過之
行也或以上句屬用巽木象周公當之下句屬舍兑
說象顏子當之

初六藉用白茅无咎

初六以陰柔而居巽之初有藉用白茅之象初所應者四之剛錯諸地可也而必藉以茅示不敢褻也藉用茅可也而必藉以白茅示不敢飾也過于敬慎故可以无咎也繫辭云苟錯諸地而可矣藉之用茅何咎之有慎之至也夫茅之為物薄而用可重也慎斯術也以往其无所失矣只閱此便明

象曰藉用白茅柔在下也

柔茅象在下藉象柔在下藉用白茅象或曰此示人

以取象之義是也傳曰以柔在下為以茅藉物之象
敬慎之道也

九二枯楊生梯老夫得其女妻无不利

當大過之時以陽居陰則過而不過以陽居陽則過
矣故二四皆吉而三五皆凶也他卦以相應為義此
獨以相比為義九本剛而居中用柔下比初陰陰陽
相濟故不至于大過也陽過則枯故為枯楊初以柔
濟之過而不至于極故生梯根發于下則幹榮于上

矣又九二以剛居柔之上老夫也初以柔順承其下
女妻也老夫得其女妻以言乎婚姻之時則過矣以
言乎男女之正則非過也能成生育之功故曰无不
利无不利繫根老夫女妻來與下爻无咎无譽一例
象曰老夫女妻過以相與也

過以相與者九二老陽初六少陰唱和之情過其常
分也

九三棟橈凶

三四皆棟象也四在三之上故隆而不撓三在四之下故撓而不隆所處之位異也三以剛居剛過剛則折故有棟撓之象傳曰以過甚之剛動則違于中和而拂衆心安能當大過之任乎故不勝其重如棟之撓傾敗其室是以凶也或曰三巽體而應于上豈无柔之象乎或曰三居過剛而用剛巽既終而且變豈復有用柔之義應者謂志相從也三方過剛上能繫其志乎說至此纔曲盡

象曰棟橈之凶不可以有輔也

三以剛自居而過剛既不受輔于人與上為應又以柔居柔不能輔人故曰不可以有輔也如項羽剛愎自用教人如何輔他雖匹夫才愈上亦與之同受橈敗之凶矣

九四棟隆吉有它吝

四居近君之位當大過之任者也以剛居柔能勝厥任故有棟隆之象若更有他志與初六之陰相應則

過于柔為可吝也傳曰吝為不足之義謂可少也或曰二比于初則无不利四若應初則為吝何也曰二得中而比于初為剛柔相濟之義四與初為正應志相繫者也九既居四剛柔得宜矣復牽繫于陰以害其剛則可吝也說至此纔曲盡

象曰棟隆之吉不桡乎下也

傳曰不桡曲以就下謂不下繫于初也或曰不桡正貼隆字隆則高立不墮故曰不桡乎下然不若傳意

渾全能盡一爻之意也

九五枯楊生華老婦得其士夫无咎无譽

九五當大過之時本以中正居尊位者也然陽過之極下无應助而比過極之陰故有枯楊生華老婦得其士夫之象按訂詁以枯楊為九五生華為上六馮厚齋曰依上文則九五宜為陽而今以上六為枯楊老婦九五反為生華士夫何也易之意蓋以枯象老在陽爻為夫在陰爻為婦不拘于陰陽之爻也從來

解未到此无咎傳云无罪咎胡氏曰陰欲陽非陽之咎也然亦非美矣只用傳一句更好

謹按二與五皆陽皆以枯楊取象而有得妻得夫之不同故說者遂異不知易之取象不拘一定隨時取義而已如此卦以相比為義二之比初陽老而陰少何也初為生而方穉之陰二乃長而已甚之陽陽在上而陰在下故有生梯之象而為老夫得女妻也五之比上陰老而陽少何也上為極而將盡之陰五乃盈而正盛之陽陽在下而陰在上故有生華之象而為老婦得士夫也夫夫雖老而得女妻則是夫係繼娶女則初婚年齒總有不齊而以男求女得婚姻之正有生育之功故无不利而過以相與也若婦已老而得士夫則是婦方衰寡士悅縞綦配合雖各適願而以女欲男當就木之年復修容以媚悅已絕生育

之望徒喪節以負後人故不久而可醜也讀者可拘文牽義以解易哉

象曰枯楊生華何可久也老婦士夫亦可醜也

枯楊生華朝榮夕瘁其能久乎傳曰老婦而得士夫豈能成生育之功未說可醜意出余意可醜言配合非偶也先儒謂二五兩爻備極人倫之變竊以其意推之老夫得女妻未嫁而夫則再娶也曰无不利于以見男子有再娶之義為嗣續計也老婦得士夫未娶而婦則再嫁也曰可醜于以見婦人无再嫁之理

程子所謂餓死事小失節事大也則事君者亦可以此意通之矣又九二剛為主而柔輔之則利九五柔為主而剛輔之則醜予以見剛唱柔隨剛先柔後之序學易者逐卦如此推去其理亦可盡也

上六過涉滅頂凶无咎

本義以上六為殺身成仁如東漢諸賢之類其說原本註疏註云志在救時疏云猶龍逢比干竊意上以陰柔之質而處過極之時與位如何便會殺身成仁

蓋以爻曰无咎象曰不可咎故有此說程傳則以為
小人過常越理不恤危亡履險蹈禍无所過咎又云
小人狂躁以自禍蓋其宜也其理似乎較勝

折衷云此文程傳以為履險蹈禍之小人本義以為
殺身成仁之君子本義之說固比程傳為長然又有
一說以為大過之極事无可為者上六柔為說主則
是能從容隨順而不為剛激以益重其勢故雖處過
涉滅頂之凶而无咎也如東京之李范李適足以推
波助瀾非救時之道況上六居无位之地委蛇和順
如中屠蟠郭泰者君子弗非也此說亦可並存按此
因外卦之象以取理程傳因本爻之象以取理本義
則會全卦大象及爻象之辭以取理雖各有取爾然
因大象澤滅木故此爻以滅頂取象夫涉而滅頂其

凶必矣而獨立不懼避世无悶何咎之有故當大過之世與其依違兩可觀望摸稜猶不如激昂慷慨奮不顧身者之為愈也總謂上六陰柔无位才弱不足以濟亦當如齊襄公之卧床嬖人戰堦御者雖不得與于死節之士而一段忠愛之心正有不可泯滅者則亦獨立不懼之謂也且彖傳言本末皆弱則上之過于勇與初之過于慎正自相等固有未可厚非者

象曰過涉之凶不可咎也

言過涉之凶不可得而咎之也

謹按過涉而至于滅頂雖不量其淺深以取禍然有死難之節而无苟免之差則聖人之言或亦原心之論也
與



坎下
坎上

習坎有孚維心亨行有尚

一陽陷于二陰之中故曰坎坎而又坎故曰習坎傳
曰習謂重習他卦雖重不加其名獨坎加習者見其
重險險中復有險而義大也項平菴曰坎卦在離震
艮兌巽之先故加習字以示五子皆當以重習起義
也乾坤不加習字者六爻祇一爻故也二說俱好一
陽中實故曰有孚蓋渾然一團實理也維心亨即以

有亨之心亨也傳曰維其心誠一故能亨通至誠可以通金石蹈水火何險難之不亨也或曰身雖陷而心不可陷故亨大凡遭際之厄恒歸造物造物所以使我不能亨者身而已不能使我心不亨也心亨則造物失其權矣行有尚即以心之亨行也不行則在險中行則出險自下而上故曰行有尚傳謂有可嘉尚以言乎其亨之徵也心亨而行亦亨也隆山李氏曰乾坤三畫以初相易而成震巽以中相易而成坎

離以三相易而成艮兌故乾坤者陰陽之祖而坎離
則天地之中也坎居正北于時為子為夜之中離居
正南于時為午為日之中夜之中而一陽生焉故坎
之三畫一陽居中日之中而一陰生焉故離之三畫
一陰居中天地陰陽之中此乃造化張本之地故易
上經始乾坤而終坎離貴其得天地陰陽之中而為
易之用也且天一下降坎中在物為水在人為精以
畫觀之坎之一陽居中而中實即精藏于中而水積

于淵之象也地二上兆離中在物為火而在人為神
以畫觀之離之一陰在中而中虛即神寓于心而火
明于空之象也坎之中寔是為誠離之中虛是為明
中寔者坎之用中虛者離之用也作易者因坎離之
中寓誠明之用誠明起于中者易之妙用而古聖人
之心學也此又發傳所未備凡為學者皆不可不知
此理

彖曰習坎重險也

一坎一險習坎者重險也謂兩險相重也

水流而不盈行險而不失其信

水字斷通貫下兩句一陽動于中流也陷于二陰而未能出不盈也逝者如斯夫不舍晝夜行險而不失其信也上句釋坎字之義下句釋有孚之義也維心亨乃以剛中也行有尚往有功也

傳曰坎中寔水流下皆為信義有孚也以剛中謂二五之德剛而得中也往有功謂有出險之功也

天險不可升也地險山川丘陵也王公設險以守其國
險之時用大矣哉

仰而觀象于天无形之險也俯而觀象于地有形之
險也王公有國者建立城郭疏通溝池以安民人以
固社稷法天地之險為人險也險之時有恁大作用
故極言而贊之也傳曰山河城池設險之大端也若
夫尊卑之辨貴賤之分明等威異物采凡所以杜絕
陵僭限隔上下者皆體險之用也如此始盡用險之

義按春秋書城虎牢而不繫于鄭胡傳曰譏鄭之失險也其得王公守國之義乎觀文王彖辭尚言處險之道使險者失其險以二陽有中寔之象而推之也孔子彖傳既明處險之道又進言用險之方便險者得其險以四陰有陷險之象而推之也

象曰水洊至習坎君子以常德行習教事

下坎一至上坎再至故曰水洊至言相仍而至也流而不息亦漸而不驟故觀其象而以常久其德行熟

習其教事傳曰人之德行不常則偽也故當如水之
有常余謂常德行者无進銳而退速无有初而鮮終
歷卑世如一日如水之過而復續也傳曰夫發政行
教必使民熟于聽聞然後能從故三令五申之若驟
告未喻遽責其從雖嚴刑而驅之不能也故當如水
之洊習余謂習教事者不輟其所已能不驅其所未
至往復以謨訓浸灌以歲月如水之盈科而後進也
本義曰治已治人皆必重習然後熟而安之言治已

則已重習使已熟而安之治人則人重習使人熟而安之也

初六習坎入于坎窞凶

初居重險之下習坎也然陰柔不能自拔又上无應援故有入于坎窞之象窞坎之險處即諺云跌坑也陷溺益深其凶可知

象曰習坎入坎失道凶也

失其所行之正道則淪于下流故凶也學者得道則

吉貧賤流放却占地步失道則凶富貴榮華都是坎
窞

九二坎有險求小得

二以一陽為二陰所陷是坎有險也然剛而得中所
求亦是自濟未至如初益深入于坎窞故曰求小得
言所得无多也傳曰君子處險難而能自保者剛中
而已剛則才足自衛中則動不失宜也

象曰求小得未出中也

求小得以其未出險中也出險則所得也大矣

六三來之坎坎險且枕入于坎窞勿用

三處下坎之上陰邪而不中正來于下則有同體之坎陷其前也往于上則有全體之坎陷其後故曰來之坎坎進退皆險不遑寧處險且枕也枕程朱俱謂倚著不安之意竊意乘其上有覆壓之象故曰枕枕于上則益陷于下故入于坎窞與初六无異勿用戒辭言无庸如此來往為也夫亦別求濟險之道而靜

以俟之可矣

象曰來之坎坎終无功也

來之坎坎終不能出險也何功之有卦所謂往有功者豈若是

六四樽酒簋贰用缶納約自牖終无咎

處上坎之下柔而得正上比九五之君故言處險之道樽酒簋贰用缶與漢君臣豆粥麥飯意同納約自牖與遇主于巷意同如是則雖在險難之時終可保

无咎也傳曰燕享之禮不尚浮飾惟以質寔所用一
樽之酒二簋之食復用瓦缶為器質之至也其說自
確註疏皆與此同訂詁云樽酒句簋貳句用缶句益
用在通頂上意言樽簋之器皆瓦也詩曰陳饋八簋
易損卦二簋可用享皆確有証據本義獨用晁氏之
說讀樽酒簋為一句貳用缶為一句謂二為副益之
意言薄禮而益以誠心也夫上既云樽酒矣下簋字
如何解且在本瓦器而以為誠心可乎至象辭說不

去又謂釋文本无貳字是改易經文也過矣畢竟伊
川之說為是納約自牖傳曰納約謂進結于君之道
牖開通之意室之暗也故設牖所以通明自牖言自
通明之處以況君心所明處詩云天之牖民如埴如
篲毛公訓牖為道亦開通之謂人臣以忠信善道結
于君心必自其所明處乃能入也人心有所蔽有所
通所蔽者暗處也所通者明處也當就其明處而告
之求信則易也且如君心蔽于荒樂惟其蔽也故爾

雖力詆其荒樂之非如其不省何必于所不蔽之事
推而及之則能悟其心矣自古能諫其君者未有不
因其所明者也故訐直強勁者率多取忤而溫厚明
辨者其說多行且如漢祖愛戚姬將易太子是其所
蔽也羣臣爭之者衆矣嫡庶之義長幼之序非不明
也其如蔽而不察何四老者高祖素知其賢而重之
此其不蔽之明心也故因其所明而及其事則悟之
如反手且四老人之力孰與張良羣公卿及天下之

士其言之切孰與周昌叔孫通然而不從彼而從此者由攻其蔽與就其明之異耳又如趙王太后愛其少子長安君不肯使質于齊此其蔽于私愛也大臣諫之雖強既曰蔽矣其能聽乎愛其子而欲使之長久富貴者其心之所明也故左師觸讐因其明而導之以長久之計故其聽也如響非惟告子君者如此為教者亦然矣教必就人之所長所長者心之所明也從其心之所明而入然後推及其餘孟子所謂成

德達才是也此可為萬世事君立教者法矣竊謂前朝劉瑾之誅借牖于宦寺嚴嵩之敗借牖于巫蠱其亦納約自牖之義乎

象曰樽酒簋貳剛柔際也

樽酒簋貳該全義剛謂五柔謂四君臣交際有明良氣象故禮薄器朴可以獻旁引曲喻可以通也傳曰君臣之交能固而常者在誠寔而已語雖淺近至理存焉漢高祖唐太宗皆有愧色

九五坎不盈祇既平无咎

九五處重險之中一陰在上是未能出險也故曰坎不盈不盈未平也既平則盈矣盈則可以出險而无咎傳曰以九五剛中之才居尊位宜可以濟于險然下无助也二陷于險中未能出餘皆陰柔无濟險之才人君雖才安能獨濟天下之險居君位而不能致天下出于險則為有咎必祇既平乃得无咎也象曰坎不盈中未大也

本義曰有中德而未大傳曰是其剛中之道未光大也
大則盈而險難可平矣又曰險難之時非夫君臣
協力其能濟乎五之道未大以无臣也人君之道不
能濟天下之險難則為未大不稱其位也

謹按此文之辭與夫象辭諸家之說俱不能暢發其
義折衷以程傳未能盈科出險之義與象傳異指良
有然矣然而俞氏何氏之說亦未得明白曉暢也嘗
合一卦之象爻傳及諸家之說反覆參訂竊意坎之
所以不盈者以其流也象傳所謂水流而不盈是也
然而有源之水不舍晝夜雖不見其盈未始不至于
平也平則可以出險矣所謂行有尚而往有功者也
何咎之有蓋水原不可盈盈則橫流泛濫又為險矣

故不盈而平則无咎也中未大者以五有中德不侈然以自大以明不盈之意也當險難之時兢業自矢翼翼小心所以卒成濟險之功而有孚心亨而行有尚也如此說方與彖傳之指不悖

上六係用徽纆寘于叢棘三歲不得凶

上六居卦之終理當出險乃以柔暗而乘五剛是有意陷陽而沈溺不反其罪惟于罪凶宜矣故有係用徽纆寘于叢棘之象徽纆皆索也三股曰徽兩股曰纆所以拘繫罪人也叢棘荀九家易坎為叢棘又今之囹圄以棘刺圍墻故曰叢棘寘者囚禁于其中也傳

曰陰柔而陷之深其不出宜矣故曰至于三歲之久
不得免也其凶可知

折衷云不得者不能得其道也如悔罪思愆是謂得
道則其困苦幽囚止于三歲矣聖人之教人動心恐
性以習于險者雖罪罟已
成而猶不忍棄絕者如此

象曰上六失道凶三歲也

道者濟險之道也卦所謂有孚維心亨是也失其道
則失其孚而心不亨无所不至矣故陷于獄至三歲
之久而不得免焉終凶之辭也傳曰言久有曰十有

曰三隨其事也陷于獄至于三歲久之極也他卦以
年數言者亦各以其事也如三歲不興十年乃字是
也極為明曉



離下
離上

離利貞亨畜牝牛吉

離一陰麗于二陽之中故曰離離本別離之離卦獨
主麗與明二義古人用字各有取爾也凡物以有所
麗而亨然非得其正不可學術不正麗之則不免于

誣人名義不正麗之則不免于失身故離利貞亨傳
曰有形必有麗在人則為所親附之人所由之道所
主之事皆其所麗也盡之矣夫麗于正者順于正也
欲順于正非涵有薰陶則无以成其德故取畜牝牛
為義坤為牛離一陰坤之中畫也故曰牝牛夫牛之
性順而又牝焉順之至也順德須養而後成故曰畜
牝牛吉畜者抑其炎上之躁性也

彖曰離麗也日月麗乎天百穀草木麗乎土重明以麗

乎正乃化成天下

離附麗也丘建安曰五為天位故離上有日月麗乎天之象此以氣麗氣者也二為地位故離下有百穀草木麗乎土之象此以形麗形者也其解最妙亦舉大者以例其餘也重明謂上下兩體也麗乎正謂二五兩爻也君臣同明而又大居正則可以化天下而成文明之治矣

彖麗乎中正故亨是以畜牝牛吉也

上曰麗乎正下曰麗乎中正言二五麗乎正者以其
麗乎中故正也麗乎中正而曰柔者指兩陰畫言為
畜牝牛張本也此句雖釋利貞却亦起下故加是以
二字項氏曰柔附本非令德以能附麗乎中正是以
吉也言牝牛本柔唯畜之然後有中正之吉也傳曰
或曰二則中正矣五以陰居陽得為正乎曰離主于
所麗五中正之位六麗于正位乃為正也學者知時
義而不失輕重則可以言易矣中正二字須如此詳

悉

象曰明兩作離大人以繼明照于四方

傳曰明兩朱子云明兩作以水游至例之故本義云作起也其解甚確水潤下故曰至火炎上故曰作明而又明繼明之象也彖傳言君臣故曰重明大象言父子故曰繼明後先輝映之意照四方即書所謂光被四表也易六十四卦惟離稱大人傳曰大人以德言則聖人以位言則王者如堯欽明而舜又文明文

丕顯而武又丕承至矣周云成康斤斤其明其亦庶幾乎

初六履錯然敬之无咎

初居離最下之地故曰履以陽居陽恃剛妄動又明體而炎上易至躁進故有錯然之象錯然者紛紜交錯无所統一也敬則主一无適小心而畏慎焉故可使錯然者漸次就理而无咎也易動而靜易躁而恬傳曰初在下无位者也明其身之進退乃所麗之道

也傳解敬字只是謹守其分而不敢進意余意即作主敬說亦是

折衷云履錯然者處應物之初也敬者養明德之本也人心之德敬則明不敬則昏于應物之初而知敬其即于咎者鮮矣

象曰履錯之敬以辟咎也

履錯則有咎矣敬者所以避而遠之謹身寡過之道也傳曰居明而剛故知難而能避不剛明則妄動矣此理亦好祇是不惹事意

六二黃離元吉

二畫即坤之中爻故坤六五曰黃裳元吉離六二曰黃離元吉彼居君位而順此居臣位而明也離黃中
央土之正色月令土无偏屬以其統備四時之德也
其文足潤色而明能光照故曰元吉所謂柔麗乎中
正故亨畜牝牛吉正謂此也

象曰黃離元吉得中道也

黃離得至中之道故元吉也不偏之謂中中者正也

故言中而不及正傳曰不云正者離以中為重所以成文明由中也正在其中矣

九三日是之離不鼓缶而歌則大耋之嗟凶

離初爻日初象二爻日中象三爻日昃象傳曰九三居下體之終是前明將盡後明當繼之時人之始終時之革易也故日昃之離日下昃之明也是則將沒矣以理言之盛必有衰始必有終常道也達者順理而為樂缶常用之器也鼓缶而歌樂其常也不能如

是則以大耄為嗟憂乃為凶也大耄傾沒也人之終
盡達者則知其常理樂天而已遇常皆樂如鼓缶而
歌不達者則恐恒有將盡之悲乃大耄之嗟為其凶
也此處死生之道也然而知命之學具此矣人亦何
可為日暮途窮之悲哉昔韓持國常嘆今日又暮矣
程子曰此常理往來如是何嘆為曰老者行去矣曰
公勿去可矣曰如何能勿去曰不能則去可矣程子
此言正可與此爻相發

折衷以梁氏之說獨得文義今按梁氏曰三居下離之終乃日昃之時也夫持滿定傾非中正之君子不能三處日之夕而過剛不中其志荒矣故不鼓缶而歌則大耋之嗟其歌也樂之失常也其嗟也哀之失常也哀樂失常能无凶乎君子值此之時則思患之心與樂天之誠並行而不悖是故不暇于歌矣而亦何至于嗟乎此則不字則字皆有著落

象曰日昃之離何可久也

日昃之離其能久乎宜有以自處矣愚謂以一日之日計之日何可久也以千歲之日計之日何不可久也知日昃之離不可久而早為不朽地焉將天地與

之同久又豈至有大耄之嗟哉

九四突如其來如焚如死如棄如

四居上離之下後明始繼之時也如人元氣纔屬正
宜悠悠溫養而四以陽居陰剛猛而不中正有凌逼
于五之象故曰突如其來如言鹵莽滅裂而來也天
下事從容詳審則可以奏功輕率躁易則易于賈禍
而況相繼之始乎

折衷云離明德也繼明者所謂有緝熙于光明其明
不息也與繼世之義全無交涉先儒有以明兩為繼

世者故程傳用說九四爻義于經意似遠今概不錄
竊嘗以來註推之火性炎上三之舊火既然四之新
火又發五得中居尊既不取上犯于五又不能下回
于三上下皆无所容而燎原之勢剛猛暴烈有不可
遏者不戢自焚故必至于焚如死如成灰棄如而后
已也如者助語辭水性潤下坎之六三在下卦之上
故曰來此來而下者也火性炎上離之九四在上卦
之下故亦曰來此來而上者也來而下必至坎窞而
後已來而上必至死棄而后已
其說最為曉暢有理故併錄之

象曰突如其來如无所容也

焚死棄故无容身之地也

愚謂言不能以順德養其明而猛烈燥暴上既不能
見容于四下又不能見容于三故始之突如其來如

者卒至于焚死棄而後已焉是皆
暴之有以自取而欲容身无所也

六五出涕沱若戚嗟若吉

柔居尊中而不正迫于上下之二陽故有出涕沱若
戚嗟若之象出涕沱若涕泗如雨之滂沱也戚嗟若
悲戚而愁嘆也極狀其畏懼憂虞不能為情之甚也
此與大畜之嗟何以異然一凶而一吉者彼以貪生
怖死為心此以憂深慮遠為意也傳曰居尊位而文
明知憂畏如此故得吉若自恃其文明之德與所麗

中正泰然不懼則安能保其吉也為戒深矣

象曰六五之吉離王公也

六五居不當位而吉者以其操心危慮患深故得麗于王公之正位也蒙引以離王公在憂懼之後信然上九王用出征有嘉折首獲匪其醜无咎

按離為戈兵為甲冑故上稱王用出征爻居卦上閭外之象也王謂五用出征用上九也上九恭行天罰敵王所愾故王嘉之如嘉乃丕續之嘉也傳曰九以

陽居上在離之終剛明之極者也明則能照剛則能斷能照足以察邪惡能斷足以行威刑故王者宜用如是剛明以辨天下之邪惡而行其征伐則有嘉美之功也征伐用刑之大者蓋以有嘉為句也訂詁亦如之朱子獨連折首為句恐未自然折首折取其魁首殲厥渠魁也執獲不及醜類脅從罔治也兵以義動而刑以仁施无咎可知若株連蔓引則非王者之師矣傳曰去天下之惡若盡究其漸染註誤則何可

勝誅所傷殘亦甚矣故折首獲匪其醜則无殘暴之咎也尤為明曉本義云剛明及遠兵用而刑不濫精

甚
象曰王用出征以正邦也

王用出征非窮兵黷武也以正邦耳正邦者使邦國之人共麗于正也詩云周公東征四國是皇孟子云征之為言正也皆正邦之義也所謂重明以麗乎正乃化成天下者正指此也

易酌卷五